

JOÃO, ESKOLANTE ne'ebé Jezús hadomi

Introdusaun

Santa Kreda celebra Tempu Paskuál nu'udar tempu atu haksolok tanba Jezús moris hi'as, Nia manán mate no manán buat hotu ne'ebé lori ema sira ba aat. Tan ne'e sarani sira haksolok, tanba Maromak nia domin la sura ita-nia sala ka ita-nia domin.

Esperiénsia

Ita hahú ho esperiénsia/jogu ida: halo labarik sira hamriik no tau banku ruma dook husi sira (metru 50/80), iha banku ida-idak leten tau sasán oinoin: xokolate ida, kadernu ho lapizeira ida, bola ida, livru ida, faru tebe bola nian ida... (importante hili buat ruma ne'ebé labarik feto eh mane sira gosta, no mós buat ruma ne'ebé ita hatene katak sira la gosta liu). Hafoin, sura to'o 3 no husu ba sira atu halai foti buat ida (sira bele hili buat ida de'it). Se labarik sira ladún barak, ida-idak bele halai ketak, se la'e di'ak liu forma grupu sira no ida de'it halai husi grupu bainhira sira hili ona saida mak foti.



Bainhira sira hamriik fali iha sira-nia fatin ho buat ne'ebé sira hili husu to'ok ba sira:



tansa sira hili buat ne'e no rona sira-nia resposta (sira sei dehan karik: “tanba ha'u gusta”, “tanba furak”, “tanba ha'u presiza”...).

Hotu ona bele lee...

Evanjellu: Jo 20,1-9; 21,2-7a

¹Iha loron uluk semana nian, iha dadersan nakukun, Maria Madalena ba to'o rate. Haree fatuk iha rate nia oin duir tiha ba sorin, ²nia halai fali hasoru Simão Pedro no eskolante ida seluk ne'ebé Jezús hadomi, hodi dehan ba sira: “Ema lori tiha Na'i husi rate, ami la hatene sira tau los Nia iha ne'ebé!” ³Pedro ho eskolante ida seluk sai kedas ba rate. ⁴Sira halai hamutuk, maibé eskolante ida seluk lalais liu Pedro, hodi to'o uluk rate. ⁵Nia hakru'uk, hodi haree hena sira namkari iha rai, maibé nia la tama. ⁶Simão Pedro mós to'o tuir nia; nia tama iha rate laran hodi haree hena sira namkari iha rai, ⁷no mós hena mutin ne'ebé hodi falun Jezús nia ulun, hena ne'e la tau hamutuk ho hena seluk, maibé lulun ketak iha fatin seluk. ⁸Hafoin, eskolante ida seluk ne'ebé to'o uluk tama hotu. Nia haree hodi fiar. ⁹Tamba to'o oras ne'e sira nia neon la dauk nakloke ba lia eskrituura nian katak Nia sei moris hi'as duni husi mate.

. ²Simão Pedro, Tome ne'ebé hanaran Kaduak; Natanael husi Kana Galileia nian; Zebedeu nia oan sira, ho tan eskolante na'in rua, halibur hamutuk iha ne'ebá. ³Simão Pedro hateten ba sira: “Ha'u ba tiha ikan.” Sira dehan ba nia: “Ami mós ba hotu.” ⁴Iha rai hun mutin, Jezús hamriik iha tasi ibun; maibé eskolante sira la hatene katak Nia mak Jezús. ⁵Nia dehan ba sira: “Labarik sira, imi iha buat ruma atu han?” Sira hatán: “La iha” ⁶Nia simu fali: “Imi soe dai ba sorin kuana, imi sei hetan.” Ne'e duni, sira soe dai, hafoin sira la bele dada mai, tan ikan barak liu. ⁷Tan ne'e, eskolante ne'ebé Jezús hadomi hateten ba Pedro: “Nia mak Na'i!”



Hafoin hatán ba pergunta sira ne'e hamutuk ho labarik sira :

- ? Tansá Pedro no eskolante ida fali halai ba rate?
- ? Tansá eskolante ida fali halai maka'as liu Pedro?
- ? Bainhira Jezús mosu iha tasiibun, tansa eskolante ida ne'e rekoñese Nia
- ? Tuir imi-nia hanoin, tansá evanjellu dehan "eskolante ne'ebé Jezús hadomi"?

***"eskolante
ne'ebé Jezús
hadomi"***

Labarik sira presiza komprende katak iha frase ida ne'e "eskolante ne'ebé Jezús hadomi" (no hadomi Jezús) iha resposta ba pergunta hotu: nia halai tanba hakarak hasoru Ida ne'eb'e nia hadomi liu, eskolante ida ne'e rekoñese Jezús, tanba iha relasaun amizade no domin ba Nia. João nia evanjellu tomak hatudu domin ida ne'e no ksolok ne'ebé nia hetan hodi tuir Jezús. No nia deside atu hakerek evanjellu tanba nia hakarak fahe ho ema seluk esperiênsia ksolok nian ne'ebé nia halo.

Orasaun

Iha salmu barak ne'ebé espresa ksolok, no ba hebreu sira ksolok la'o nafatin hamutuk ho hahi'i no agrade-se Na'i, tanba ksolok loos nia hun mak Maromak (haree salmu 148). Bele reza hamutuk salmu ida ka inventa orasaun ida ne'ebé espresa katak ita hakarak fahe ita-nia ksolok.



Atividade

Ksolok mak emosaun ida ne'ebé presiza fahe atu sai boot liu tan: ksolok hanesan ahí ida: se ha'u haksolok mesak, hanesan tau ai-sanak ida de'it, ahí sei mate lalais; maibé bainhira ha'u haksolok ho ema seluk, hanesan tau ai-sanak Barak iha ahí... ahí sei sai manas liután! Nu'udar grupo bele organiza saida atu bele fahe ita-nia ksolok ho ema ruma ne'ebé moris triste ka mesak (ez: halibur katuas no ferik sira prepara festa ida ba sira, ba hananu ba sira...)